

Tuberkulosimut kapitinneq nunatsinni tuberkulosimik tunillanneqarnissamut tuberkulosimillu nappaateqalernissamut illersuutaavoq

Tuberkulosi BCG-millu kapitinneq

Silarsuarmi innuttaasut pingajorarterutingajaat tuberkulosimik tunillatsissimapput, inuillu 9,6 millionit missaat tuberkulosimik nappaammik ineriartortitsisimapput, taannalu ukiumut 2 millionit missaasa toq-qutigisarpaat.

Tuberkulosimut kapuut - Bacillus Calmette-Guerin (BCG), aamma calmettevaccinimik taaguutilik – ukiumut meeqqanut millionilikkaanut silarsuaq tamakkerlugu kapuissutigineqartarpoq. Kapuutilli sunniutaa misissuinnermiit misissuinnermut nikerartorujussuuvoq. Najoqqutarineqarpoq BCG-mik kapuut tuberkulosip bakteriasa timimi siaruaatinnginnissaannut illersuutaanera, nalornigineqarporli kapuut tunillatsinnissamut aamma puatsigut tuberkuloseqarnermut, tassa tuberkulosit nalinginnaanerpaartaannut, illersuutaanersoq.

Tuberkulosimik tunillatsissimasut 10%-iisa missaasa napparsimassutigilersarpaat, tunillatsissimasulli 90%-iisa napparsimalissutigisanngilaat tunillatsissimanertilluunniit malugissanagu.

Nunatsinni BCG-mik kapitinneq

Nunatsinni tuberkulosimik nappaateqartut amerlapput, tassa innuttaasut 100.000-uppata 2012-imi tuberkulosimik nappaateqartut 157-iullutik. Kalaaliaqqat inoorlaanerminni BCG-mik kapitittarput, taamaassimavorlu 1955-imiilli, –1991-imiit 1996-imut kapitittarnerup unitsinneqarnera eqqaassanngikkaanni. Tassa imaappoq maanna inersimasut inuusunnerit 1991-imiit '96-imut inunngorsimasut amerlaqisut akiuussutissamik kapitissimanngitsut tunillatsissimasut qanorlu amerlatigisut napparsimalersimanersut 1991 sioqqullugu 1996-illu kingorna inunngorsimasunut naleqqersuunneqarsinnaasut. Nunatsinni tuberkulosimik nappaateqarneq pinnitsoorani nalunaarutigineqartartussaavoq, napparsimasullu tamarmik nuna tamakkerlugu tuberkulosertunik nalunaarsuiffimmi nalunaarsugaapput.

Nunatsinni tuberkulosimik BCG-millu kapitinnermik misissueqqissaarnerit pingasut


2012-imi nunatsinni misissuinerit pingasut ingerlassimavagut: 1) Tunumi Tasiilami eqqaanilu 6-iniit 30-inut ukiullit tamaasa misissuinnerit peqataanissamut qaaquagut, tuberkulosimik tunillatsissimanersut misissorneqarluni. 80%-it peqataanissamut angerput. 2) Ilutigitillugu nalunaarsukkani taamatut ukiulinnut Tunumeersunut inunngorneranniit 2012-ip tungaanut paasissutissat atorpagut paasiniallugu meeqqat inersimasullu inuusunnerusut kalaallit tuberkulosimik nappaammik ineriartortitsisimanersut. 3) Nalunaarsukkanik misissuineq taamaattoq kalaallinut tamanut taamatut ukiulinnut aammattaaq ingerlapparput.

Meeqqat inersimasullu inuusunnerit 953-it tuberkulosimik tunillatsissimanersut misissorpagut. Katillugit 29%-it tuberkulosimik tunillatsissimapput. Peqataasut akiuussutissamik kapitissimanngitsut 57%-ii tunillatsissimapput, kapitissimasullu akornanni 23%-it tunillatsissimapput. Tuberkulosimik nappaateqarnermik misissuinnermi nuna tamakkerlugu nalunaarsuiffiit ikiorsiullugit meeqqat inersimasullu inuusunnerit 1.697-it malinnaavigaagut. Tuberkulosimik tunillatsissimaneq napparsimalernermik kinguneqartarnersoq misissoratsigu assigiinngissut malunnarlualarpoq: Katillugit 6%-ii nappaammik ineriartortitsisimapput, akiuussutissamik kapitissimanngitsut 11%-ii, kapitissimasullu 4%-iinnai nappaammik ineriartortitsisimallutik. BCG-mik kapitinnermik Kalaallit Nunaanni innuttaasut tamarmik akornanni nalunaarsukkanik misissuinnerup takutipppaa tuberkulosimik nappaammut illersuutaasumik sunniutaa nunatsinni tamarmi Tunumi takusatsitut ittoq.

Misissuinermermi angusat takutippaat Kalaallit Nunaanni innuttaasuni BCG-mik kapitinneq **tuberkulosip bakteriaanik tunillatsinnissamut** aamma **tunillatsinneq tuberkulosimik napparsimalernissamut** illersuutaasoq. Angusat taakku silarsuaq tamakkerlugu pingaaruteqarput, BCG-millu kapitinnerup pingaaruteqassusaanut nalinginnaasumik paasinninnissamut ilapittuutaalluni.

Titartakkap oqaasertai: Tuberkulosimik tunillatsissimaneq, ukiut aamma BCG-mik kapitinneq

Titartakkap takutippaa peqataasut tuberkulosimik tunillatsissimasut procentinngorlugit, ukiuinut naleqqiullugit. Utoqqaliartuaartuni tuberkulosimik tunillatsissimasut amerliartorput. Titarnerup kipisaqattaanngitsup takutippai peqataasut BCG-mik kapitissimasut akornanni tunillatsissimasut amerlassusaat (1991 sioqqullugu imaluunniit 1996-ip kingorna inunngorsimasut), titarnerullu kipisaqattaartup takutippai BCG-mik kapitissimanngitsut akornanni tunillatsissimasut amerlassusaat (1991-imiit 1996-imut inunngorsimasut). Titarnerup kipisaqattaanngitsup kipisaqattaartullu assigiinngissutaasa ersersippaat tuberkulosimik tunillatsissimasinnaaneq BCG-mik kapitissimanngitsut akornanni qaffasinnerusoq.



Suliarinnittoq: Sascha Wilk Michelsen, swm@ssi.dk. Afdeling for Epidemiologisk Forskning, Statens Serum Institut, Artillerivej 4, 2300 København S.

Aallerfiit: Michelsen SW, Soborg B, Koch A, Carstensen L, Hoff ST, Agger EM, Lillebaek T, Sorensen HC, Wohlfahrt J, Melbye M. The effectiveness of BCG vaccination in preventing Mycobacterium tuberculosis infection and disease in Greenland. Thorax. 2014 Jun 26.